

ULUG' KUNLARDA YaNA BIR MUAMMO O'Z YeChIMINI TOPDI



ULUG' KUNLARDA YaNA BIR MUAMMO O'Z YeChIMINI TOPDI

Deputat xalq dardu tashvishlari bilan yashaydigan, uning muammo va kamchiliklarini yengishda astoydil kamarbasta bo'lgan insondir. Aytish lozimki, bevosita xalq tomonidan saylangan deputatlar sa'y-harakati va ularning tegishli idoralar bilan yaqin hamkorligi tufayli fuqarolarni qiynayotgan ancha-muncha muammolar o'z yechimini topmoqda.

- Aytish lozimki, bizning mahallamiz aholisi ham ichimlik va sug'orish suvi yetishmovchiligi tufayli ayniqsa, sug'orish davrida ko'p muammolarga duch kelishadi. Mahallamizda mavjud bo'lgan nasos ishdan chiqqanligi sababli 2-sektor rahbariga ushbu muammoni bartaraf etish maqsadida murojaat etgan edik. Qilingan sa'y-harakatlar va hamkorlik tufayli ushbu muammo ushbu ulug' kunlarda o'z yechimini topdi, - deydi Saribozorcha mahallasidan tuman Kengashiga saylangan deputat Tohirjon Nurov.

Bevosita mahalla deputati, saxovatpesha insonlar va ikkinchi sektor rahbari, tuman prokurori Sadirali Mirzokarimov tashabbusi bilan yangi nasos olib kelinib, o'rnatildi. Endilikda ushbu nasos orqali tortiladigan suv mahallaning sug'orishga bo'lgan talabotini qondiradi.

- Ushbu suvdan mahallamizdagi 120 tadan ko'proq xonadon foydalanishadi. Biz buning uchun mahalla ahli nomidan deputat Tohirjon Nurov, R. Sohibov va albatta tumanimiz prokurori, sektorimiz rahbariga samimiy minnatdorchilik bildiramiz, - deb bizga yuzlandi mahalla raisi Valijon Ergashev.

Shuni ham qayd qilish lozimki, Ramazon hayiti arafasida deputat Tohirjon Nurov tomonidan 80 nafar kam ta'minlangan va ijtimoiy kumakka muhtoj fuqarolarga moddiy yordam sifatida yog' mahsulotlari yetkazib berildi.

So'x tumani hokimligi Axborot xizmati

2022-05-03 14:21:45